



Japan Ato Kilonser Shigeru
Ishiba-i mapa yutsür

Aryna Sabalenka-i US Open
tetsür kija asaya kokogo



RMSA-2016 tesayurtemi tanü nungi lungkak aittsü

Dimapur, September 7, 2025 (TYO): Rashtriya Madhyamik Shiksha Abhiyan (RMSA) 2016 kübok shimokba tesayur 367-i Hombar nungi Directorate of School Education, Kohima nung menner lungkak aittsü.

Supreme Court of India-i oshidang agüjaka sorkari ola madokba aser mapa meinyakba atema onoki lungkak aittsü ta RMSA-i sangdong ka nung ashi.

Onoki temeten meshia aser akhangba ama mapa inyaktüsü rongshia timi lungkak aittsü ta parnoki ashi.

Kohima Deputy
Commissioner-i tetuyuba

agütsüba ama onoki timi dang lungkak aittsü. Civil societies, kaketshir teloktem, workers association aser public-ia onok pusema nungittsü ayongzüker ta RMSA-2016 Teachers-isa metetdaktüsügo.

Parnoki akhangba rongnung 2016 nungi parnok shimokba anogo nungi salary aser service benefits dena lir.

Parnokisa annual increments dena ROP 2017 pay scale meshir, SSA-RMSA 2010-13 teachers den kasa itasen agütsüsü aser Office Memorandum No. AR-3/GEN-231/2011 dated 29 March 2017 mapa küma inyaktüsü akhanger.

NJUM-i Dip Saikia otsü jangjashitsür

Dimapur, September 7, 2025 (TYO): Hornbill TV journalist Dip Saikia dak injang khaloktsüba dak sendakba nung Naga Journalists Union Manipur (NJUM) fact-finding team kati bushisüngdang arudang bushitetba osang metetdaktüsügo.

Dip dak injang airgun agi injang khaloktsüsangji Reiveinii Ramai (26 years) ta jangjaogo. Pa ya Phuba Khuman nungi Dale'er jabaso aser tang Council, Senapati nung telidak lir.

Dip dak iba lendong atalokba sülen social media nung osangtsüsang balala prokshia liasü aser saka NJUM-ibo press den sendaktepa alirtem dak mapang shia ozüng alema inyaksangshiba nung ajemdaker bushisüngdang tenzüik ta NJUM Secretary Vangamla Salle KS-i sangdong ka nung ashi.

Journalist kati osang shitakba ashitsü tebilemtsü khuret meteta lir ta asüba nung ajemdaker NJUM-i züngsem aseme akümba fact finding team ka tentet.

Iba teloki Tungjoy Police Station, Senapati District kübok Laii yimtsüngi ao aser police aser yimtsüng lennirtem den ajurutep aser ano Dip Saikia dak lendong atalokba tesem semdang.

NJUM-i shimtetba telokisa police ket nung yua aliba Ramai aser Guwahati nung temang

anepaluya aliba Saikia naprong den jembia liasü.

Iba anogo ya tzünglu aruya liasü aser tzüsü agi sübanga liasü aser Ramai-i airgun khaloktsüdang Saikia mesüra tangar alibaji memetet. Yimdaklirtemia Saikia Laii Primary Health Centre-i anir aruba sülen ang iba osang meteta aküm ta NJUM-i bushitet.

Saikia dak injang agi yiruba osang angashiba sülen Ramai-i pa sasa Laii PHC-i aotsü mulungtet. Ramai-isa village council members aser village headman lia Saikia dang tatok meshi aser pa anepaluba nung yariteptsü mulunga aliba ashi.

August 31, 2025 nü Tungjoy Police Station nung Arms Act kübok FIR ka benokba aser Senapati Police-i mapang shitak nung tai tonglokja alir apuba atema tenüngsang agütsür ta NJUM-isa metetdaktüsü.

NJUM-i tatem oshidang agütsüsü atema masü saka tatalokba otsü jangjatsü atema iba mapa inyak. Ozüng amertemi iba ken o maneni bushisüngdang südar aser nisung ajak den amalitepa yariteptsü mulunga lir ta parnokisa ashi.

Public tesemtem nung nisung yirutsüsa oset/prangpong amshiba aitsür aser bushisüngdang shitak süa aibelenertemi ozüngi merenshitsü ayongzüker ta NJUM-isa metetdaktüsügo.

Linük nung mezüngbuba bamboo-based biorefinery Assam nung lapoktsü

Guwahati, September 7, 2025 (Agencies): Prime Minister Narendra Modi-i September 14, 2025 nü India nung mezüngbuba bamboo-based biorefinery project lapoktsüsü.

Golaghat district kübok Numaligarh nung iba project lapoktsü aser iba ajanga India nung green energy sector tali renloktsü.


"Nenoki noksa nung anguba ya India nung mezüngbuba bamboo-based Bio Refinery Project lir. Prime Minister Shri Narendra Modi-i September 14, 2025 nü iba ya linük nem bendanga agütsüsü" ta Assam chief minister Himanta Biswa Sarma-i Deobarnü metetdaktüsü. Numaligarh Refinery Limited

(NRL) project ya Finnish technology firm Chempolis Oy den yaritepa Rs1,700 crore endoka tenzüiker. Iba nung aou agi ethanol, furfural, aser acetic acid yanglutsü.

Kümshia iba project nung aou 300,000 metric tones shi process asütsü aser iba ajanga Northeast nung aluyimertem aser entrepreneurs ajangzüktüsü. Maneni, iba mapatong ajanga India-i 2030 tashi nung 20% ethanol blending target yua aliba nung yariteptsü.

Iba mapatong ajanga India nung biofuel industry melenshiba dang masü saka Assam-i Northeast nung green industrial transformation shilem agiba tashi aittsü ta ketdangsürtemi ashir.

Opposition VP candidate Reddy-i MP tem ayongzüker



INDIA bloc atema Vice President candidate B Sudershan Reddy

New Delhi, September 7, 2025

(Agencies): Congress-i aniba INDIA bloc atema Vice President candidate B Sudershan Reddy-i MP tem dang pa nem vote enoktsübaji kija ka atema masü saka linük tanüla nem vote enoktsüba ama asütsü ta metetdaktüsügo.

Sudershan Reddy ya taoba Supreme Court judge lir aser Gauhati High Court nunga Chief Justice inyakogo.

"Democracy ya toktepba nung masü saka amalitep ajanga tejakleni aoer aser kü tashiji angaba, tiyongtsü nung inyakba aser angatettepba nung amendaka lir" ta Reddy-i ashi.

September 9, 2025 nü MP

temi India nung taruba Vice President shimtetsü. Iba election nung INDIA bloc candidate Reddy aser BJP-i aniba NDA candidate CP Radhakrishnan na tokteptsü. Radhakrishnan ya BJP-RSS veteran ka lir aser tang Maharashtra nung Governor teinyakdak.

"Iba election nung party whip kecha mali, iba tetezü ya party temi parnok züngsem nem tetuyuba kecha magütsütetsü. Linük meimba tangatetba agi na len anidakjangma" ta Reddy-i tanü MP tem ayongzüker.

"Ni atema masü saka asenok sovereign democratic republic ka asüba tangatetbatem atema nenok teyari meshir" ta paiza

ashi.

Taoba Vice President Jagdeep Dhankhar-i kanga dang ajungbena sodi agiba ajanga iba election agitsüsa akümer. September 9, 2025 nü shiba shimdir pai Rajya Sabha nung chairperson inyaktüsü.

"Rajya Sabha ya pei pei taginüba masü saka linük taginüba benokdak ka asütsüla. India nung democratic tawa ajema akümer aser asenoki ibaji kümzüka ayutsüla" ta Reddy-isa MP tem dang ashi.

"Ni election nung toktepba ya kija taginüba atema masü saka democracy kümzüka ayutsü atema külemi yaritepba lir" ta paiza shisem.

PM Modi-i Manipur aritepa dang semdangba aitsür: Congress

Guwahati, September 7, 2025

(Agencies): Prime Minister Narendra Modi-i kanga dang aritepa Manipur semdangtsü sentong renema lir aser iba ya nübortem mezüngmeshiba mapa ka lir ta Congress-i metetdaktüsü.

Nübertemi küm ana ser tesadang jungnüa pa arutsü atar saka ghonda 3 atema dang semdangtsübaji mesemdangba den kasa ta Congress general secretary Jairam Ramesh-i ashi.

"Prime Minister pusemertemi pai semdangbaji kanga tongtipang ama jembir saka asangsang nungbo pai Manipur nung ghonda 3 dang anenzüksü. Iba mapang tsüngda pai kechi inyaktetsü? Ita 29 lir külen aritepa semdangbaji Manipur nung alirtem mezüngmeshiba dang asütsü" ta Ramesh-i ashi.

"Modi-i bendang linüktem mapang shia semdangir saka pai Manipur semdangtsü memulungi dang aru. Nübertemi pa dang

semdangi arutsü kanga mepishiogo" ta paiza ashi.

Modi-i tatemsa Manipur semdangtsü mulungtetogo saka kanga menuogo aser pai semdangba ajanga temelenshi balaka malitsü ta Congress-i tesüiba nunga metetdaktüsügo.

Manipur nung May 2023 nungi Meitei o Kuki-Zo nunger tsüngda mepetmesü adoka rarayonga arudang nisung 260 tema taküm samaogo aser nisung meyrjang aika pei talidak toktsür ogo. Iba tebilemtsü atema PM Modi dang aiben Manipur semdangtsü mepishia aru saka pai khien danga mesemdang lir.

Taküm Chief Minister N. Biren Singh-i menden toktsüba sülen yimtenren tensa tamajungba aküm aser iba jagi Centre-i President's Rule benok. Manipur Assembly ya tang anena lir saka parnok kümsük 2027 tashi lir.

Prime Minister Narendra

Modi-i tan September ita tomnen Manipur semdangtsü sentong aliba atema Governor Ajay Kumar Bhalla-i Deobarnü Raj Bhavan nung senden ka ayonga menogo.

Iba senden nung taoba Chief Minister N. Biren Singh densema tongtipang ketdangsürtem aser BJP lennirtem aden.

Senden nungsa Chief Secretary Puneet Kumar Goel, Security Advisor Kuldiep Singh, aser Director General of Police Rajiv Singh nunger den State BJP president A. Sharda Devi aden.

Prime Minister Modi-i semdangtsü indang 'formal announcement' kecha mali saka osang angazükba agi pai September 13 nü Mizoram semdanga Bairabi-Sairang railway project lapoktsüsü.

Iba sülen pai Imphal semdangtsü ta angazüker saka iba dak sendakba osang tejangja kecha mali.

BRICS summit nung Dr. Roland Lotha-i o jembitsü



Dr. Roland Lotha

Dimapur, Rongjui/Sept. 07 (TYO): Timtem nung aliba nüburtem yariba mapa inyaker nübu tejangja Dr. Roland Lotha ya Brasilia, Brazil nung II BRICS Forum "Traditional values" nung o jembitsü jaoka lir.

Iba sentong ya September 15-17, 2025 anogotem agitsü lir, aser ibai Brazil indang BRICS Presidency nung shilem ka aser humanitarian cooperation aser

yimjung yangluba nung rangloker agitsü.

Iba ama alima nung tejangja forum kati Dr. Lotha jaokba yagi pai anibelem mesasai makamaiter aser tajemzükba tia nung alirtem pa sasa mulungteta yariba aser mapa tajung inyakba jangjatsür.

Guest Speaker ka ama Dr. Lotha-i Round Table on "HUMANITARIAN COOPERATION AND

PEACEMAKING: Success Stories and Presentation of BRICS Countries' Needs," nung shilem agia BRICS linüktem indang international volunteer projects dak sendakba ken o jembitsü.

Dr. Roland Lotha ya Rson Heart for Poor People Trust (RHPPT) indang chairman lir, koba par jabaso tenüing nung makamaiter aser tepetzük tia nung alirtem yaritsü nükjidong nung pai tenzük. RHPPT ajanga Dr. Lotha-i maneni nüngdakbapur maneni ajungmesor aser jenjang ajungkettsür.

"Iba international sapang nung Dr. Roland Lotha mapa jangja agizükba asoshi onok kanga pelar. Pai yangji shilem agiba ajanga tesendaktep nung tali tashi itshitsü aser volunteerism ajanga humanitarian cooperation tejakleni aotsü," ta Media Cell, Rson Heart for Poor People Trust ajanga ashi.

II BRICS Forum ya UN International Year of Volunteers for Sustainable Development in 2026 den lirumedema inyaker, aser BRICS linüktem nung volunteer movements atema lungjemer inyaksü asoshi jembishinür.

Niuland nung awareness sentong ayongzüka agi

Dimapur, Rongjui/September 7 (TYO): District Administration Niuland aser District Hub for Empowerment of Women (DHEW) na senteper, mapa inyakba tesem nung tetsürtem kümzüka toktsütsüba dak sendakba nung Sankalp kübok September 6 nü DC Conference Hall, Niuland nung awareness setong ka ayongzüka agiogo.

Tekümzüka kübok akümtsüba agi sünga aliba mapa inyakba tesem amenoktsü atema jenjang agitsü asoshi sensak asemstsü aser iba indang

angazüktsü atema iba sentong nung wadang balala nung nüburtem longjemdaksüogo.

Sentong nung shisalen sayur EAC Kelengunuo Solo-i, iba campaign omen dak ajemdaker jembis aser laisa, mapa inyakba tesem nung tetsürtem kümzüka toktsütsü koda tongtibang iba indang lemsatepa liasü.

Lai, Prevention of Sexual Harassment (POSH) Act 2013 aser Sexual Harassment Electronic Box (SHE Box) portal indang lemsatep, aser sentepa aliba lokti dang parnok temeden aser resource balala

aliba indang tangazükba agüja liasü.

Mapa inyakba tesem nung tetsürtem mezüngmeshia amshiba jangjatsü aser iba ya bentettsü atema tetsürtem nem shisatsü agütsütsü nükjidong nung iba sentong ayongzüka agiogo.

District Administration Niuland aser DHEW nati, Sankalp amala inyakyimtem ajanga tetsürtem nem tashi agütsütsü aser parnok kümzüka toktsütsü atema bendanga agütsür aliba nenshia metetdaksüogo.

Zeliangrong Prayer Fellowshi KSCJ-i KLBC D Bloc semdang



Kohima Science College Jotsoma nung aliba Zeliangrong Prayer Fellowship-i September 7, 2025 nü Kohima Liangmai Baptist Church D'Block semdangba mapang tangokba noksa ka yangi angur.

Dimapur, Rongjui/Sept. 07 (TYO): Kohima Science College Jotsoma nung aliba Zeliangrong Prayer Fellowship-i September 7, 2025 nü Kohima Liangmai Baptist Church D'Block semdanga liasü.

Iba fellowship nung kaketshir 52 den Katasinliu Remmei, HOD, Dept. of

Zoology, KSCJ & ZPF Advisor dena liasü. Sentong nung Katasinliu-i Tsüingrem o jembidang chichiba Khristan ka ama alitsü ayongzüka liasü.

Nüburtem tesendaktep tali tashi aittsü aser Khrista den tesendaktep akangshitsü nükjidong nung iba sentong ya ayongzüka.

Sentong nung Kohima Liangmai Baptist Church D Block youth department ajanga temeja ken ka aten aser KLBC Pastor, Rev. N. Silubo Zeliang-i Zeliangrong Prayer Fellowship Kohima Science College Jotsoma mapa tajung asoshi tenüingsang agüja liasü.

Metongshitsür

Dimapur, Rongjui/Sept. 07 (TYO): Unity College, Dimapur nung September 6, 2025 nü 19 buba Freshers-cum-Annual Day amungdang DIG Rupin Sharma, IPS ajanga college journal aser magazine sayatsür ta noksa ka adoktsüba

nung aibelena pa indang designation DIG ta inoktsü. Anungji tzünger temi metongshia DGP Rupin Sharma, IPS ta azüngtsü ayongzüker. Aibelenba atema sasar, ta DIPR sangdong ka ajanga ashi.

Assam-i Himachal Pradesh nem sen 5 cr teyari agütsütsü

Guwahati, Rongjui/Sept. 07 (Agencies): Tzümetsüng agi kongshia alir tem tang teyari tagütsüdak aliba nung yarisemtsü atema Himachal Pradesh Chief Minister's Relief Fund nung sen 5 crore inoktsütsü, ta Assam Chief Minister Himanta Biswa Sarma-i sangdongogo.

Tripura-ia iba mesük teyari agüja alimar lendong ajurua aliba state nem Assam den sako sen agütsüogo.

"Himachal Pradesh nung tzümetsüng tesashi ajanga nisung takum aser rongsen jenti laluogo. Mangyima aliba kinungertem den asükhu lemsateper aser kongshir alirtem tekeraba nung taneptsü angutsü atema sarasademer. Assam nüburtem tenüing nung onoki Chief Minister's Relief Fund of Himachal Pradesh nem sen 5 crore agütsütsü," ta Sarma-i social media X nung zülü.

Tzünglu kanga sashia arua tesem balala nung teraksa bener arutsüba ajanga Himachal Pradesh nung tang tashi nüburtem timtema lir. State Emergency Operation Centre (SEOC) ajanga ashiba agi September 7 tashinung lenmang 866 nokdanga lir aser yangji tongtipang NH-3, NH-5 aser

NH-305 dena lir.

Kullu district nung tamajungtiba kongshia lenmang 225 mokdang. Mandi aser Shimla nunga lenmang 191 aser 154 nung kongshia liasü.

Chamba, Kangra, Sirmaur, Solan, Lahaul & Spiti, aser Hamirpur densema ani danga district aika nung teraksatsüba jenti lir.

Tzümetsüng ajanga Himachal Pradesh indang electricity ki o jen nunga kanga sashia teraksatsüba agüja lir. Tang power transformers 1,572 mapa meinaker aser Kullu nung units 873, Mandi nung 259 aser Lahaul aser Spiti nung 142 raksar lir.

Himachal Pradesh nung meyi tzünglu dak sendakba nung asü-amaba nisung 366 lir, aser yangji tzünglu dak sendakba nung asüba 203 aser lenmang nung lendong ajurua asüba 163 lir.

Kumzüka aser teyari agütsüba maparen tang teinyakdak lira ser India tesem balala nungi maneni teyari agütsütar.

Tripura Chief Minister Manik Saha-ia Himachal Pradesh Chief Minister's Relief Fund nung sen 5 crore agütsütsü nangzüka lir.

CM Dr. Rio-i Nerhema nung Multi Utility Hall semzüksü

Dimapur, Rongjui/Sept. 07 (TYO): Multi Utility Hall semzüksüba aser Khuvie benjongmung sentong September 6, 2025 nü Nerhema Village, Kohima nung agiogo.

Nagaland Chief Minister Dr. Neiphiu Rio-i iba hall semzüksü aser Khuvie benjong tenzükba sangdonga liasü.

Iba sentong nung jembidang, yimtsüng nung telungiem aliba ajanga sentong takok ngua angierter ta ashi aser lokti adenshitsu asoshi tesem tesadem agütsüba asoshi Tribal Affairs aser Local Area Development project (Iconic fund) kübok Multi-utility Community Hall takok ngua renemba asoshi yimtsüng nung lenirtem nem tenüingsang agütsü aser Department ajanga organic farming wazüka ayutsü asoshi benjong ayongzüka atema pelaba lemsatepa liasü.

CM-i Chiephobozou nung Elders Forum Building semzüksüba mapang Forum dang tanü lanurtem shidak-tai metongshija shisatsü shidak agüja anitettsü ayongzüka liasü. Director, Horticulture Department, Ayieno Hibo-i o tatsüka jembidang, ibai alu nung züsentetba chiyongtsütem atema kisüng masü saka aluyimer, sobaliba aser local producer tashi indang lir, ta ashi.

Aluyimer temi putu aika metsü-jang mesamadaktsüi

amshia arur, aser parnok shisatsü, taremsük aser bendanga agütsür inyakba ajanga khuvie cultivation mesamadaktsür, ta lai ashi.

Khuvie nung nükla tajung lir, aser kanga junga anepalua rizüngba, amshiba ajanga aluyimer tali ajangzüksü, ta ashi.

Lai lokti dang maneni aluyimer yaritsü ayongzüker aser sobaliba tajung maneni amshitsu ajungshia liasü.

Laisa aluyimer dang Viksit Bharat 2047 mangdang atalokba nung shilem agitsü ayongzüka liasü.

Iba sentong nung Kekhriengulie Theünuo, Member of Organising Committee menden liasü; Keyasetuo Kengurüse, Convenor of Organising Committee ajanga benjongmung ratet tongmelang agi ashi.

Sentong tenzüka Rev. Vilanyü Usou, Pastor, NBC ajanga sarasadem, Vingutuo Rutsa, Chairman, Nerhema Village Council ajanga pela agizükba o jembis aser Neiketouzo Kengurüse, Member, Organising Committee ajanga ki asüba osang agüja liasü.

Dr. Kruolalie Tsürho, Team Leader, NBRM ajanga o tatsüka jembis aser Thejaneinuoa Kiewhuo aser Harmony voice ajanga ken aten aser Sevilie Kerhiio, President, Nerhemia Dzevi Houzha ajanga melepzüng o jembia liasü.



September 07, 2025 nü New Delhi nung Delhi Chief Minister, Rekha Gupta leniba nung ketdangsertem senden ka mena Shalimar Bagh Assembly constituency nung terenlok projects asadangba mapang tangokba noksa nung angur.

Maharashtra nung Ganesh süngyanglu indokdang nisung aika arakset

Mumbai, Rongjui/ September 07 (Agencies): Maharashtra state tesem balala nung Ganesh tsüngrem süngyanglu tzü nung inoktsüdang nisung pezü asü aser nisung 13 samaogo, ta Amongnü police-i metetdaksü.

Pune district kübok Chakan area nungbo lendong aika atalok. Waki Khurd nung aliba Bhama ayong nung nisung ana tzü agi ponger ao aser Shell Pimpalgaon nunga nisung ka tzü agi ponger aso. Birwadi nunga nisung ka tzü nung arakset.

Tang tashi nung tasü mang ana nguogo aser maneni tanü ngba anaji bushidar, ta ketdangsertemi metetdaksü.

Ano Nanded district nunga Gadegaon area nung nisung asem ayong nung samaba sülen kabo kümzü k saka tanü ngba anaji mangur.

Nashik district nunga nisung pezü tzü agi ponger aoba sülen tasü mang kabo Sinnar nung nguogo. Jalgaon nunga nisung asem ayong nung samaba sülen tang tashi shinga mangur.

Thane nunga nisung asem

samaba sülen tasü mang kabo nguogo. Amravati nunga Ganesh süngyanglu tzü nung inoktsüba mapang nung nisung ka arakset.

Ketdangsertemi ashiba agi, tawa tzü nglu kanga arua ayong nung tzü tali ayimba ajanga taküm iba ama lendong kanga bulua ataloker.

State tesem balala nung state disaster response teams aser National Disaster Response Force (NDRF)-i tüzü metsü ng aliba tesemtem nung kümzü kba maparen inyakdar.

Modi asobamong nü ngtem nung BJP-i hopta ana 'Seva Pakhwada' agitsü

New Delhi, September 07 (Agencies): Ato kilonser Narendra Modi sor küm 75 ajungtsü aliba nü ngtem nung BJP-i September 17 nungi October 2 tashi hopta ana piyong "seva pakhwada" agitsü, ta Amongnü Union Minister, Mansukh Mandaviya-i metetdaksü.

"Pakhwada" tenzü kba aser tembangba naji Ato kilonser Modi asoba anogomong aser Mahatma Gandhi asoba anogomong (October 2) na lir.

BJP Yuva Morcha (youth wing)-i yimti 75 nung 'Namo Yuva run' ayongzü ktsü aser sentong shia nungji nisung 10,000 dak temai shilem agia asemtsü.

"September 17 nungi October 2 tashi, Ato kilonser asoba anogomong nungi Gandhi asoba anogomong tashi, anogo

15 tashi linü k aser BJP-i 'seva pakhwada' ayongzü ker," ta New Delhi nung osangbenertem senden ka nung union minister-i metetdaksü.

"Küm 11 tsü ngda Ato kilonser Modi-i pa mapa ajanga linü k nem aika agü tsü ogo. Tanübo linü k tejakleni aoer, renloker aser India tasen ka yangerdar. Red Fort nungi jembidang Ato kilonser Modi-i, linü ki nü chiso atema raradang lanurtemi taküm bendanga agü tsü tsü atema marendaki liasü ta shiogo," ta Mandaviya-isa shisem.

'Namo Yuva run' dak sendakba nung union minister-i, iba sentong nung shilem agia asemtsü atema nisung lakh aikati 'MyBharat' platform ajanga tenü ng agü tsü ogo, ta ashi.

Paisha, iba sentong ya yimti

75 nung agitsü aser asema ajanga temesepba mozü yutsü tsü aser lanurtem atema Terenlok India agü tsü tsü osang sangdongtsü, ta pai metetdaksü.

September 17 nungi October 2 tsü ngda agitsü aliba sentongtem rongnung - September 17 nü district 1000 nung azü tenla agü tsüba camps agitsü, September 18 nungi October 2 tashi nung Mandal shia nung azü tenlaba camps agitsü, September 18 nungi October 2 tashi schools, hospitals, railway stations, bus stands, tekülem kitem, parks, ayongkü m aser nü ngshi kiojentem merü ktettsü. Iba dak alia 'Viksit Bharat' indang painting tetoktepba agitsü, aser iba sentongji Ministry of Culture, Government of India-i ayongzü ker.

Supreme Court-i asentenshir SIR ken otem angadangtsü

New Delhi, Rongjui/ September 07 (Agencies): Supreme Court-i asentenshir Hombar nungi Bihar nung electoral roll indang Special Intensive Revision (SIR) anema benoka aliba ken otem angadangtsü, ta ketdangsertemi metetdaksü.

November ita nung Bihar nung assembly election agitsü lia Election Commission-i electoral roll atema SIR benokba sülen opposition party temi SIR anema ken o benok.

Justices- Surya Kant aser Joymalya Bagchi nati akü mba bench-i asentenshir item temepishiba ken o angadangtsü.

Rashtriya Janata Dal (RJD) aser tanga party temi draft electoral roll nung tashishiba agü tsü tsü atema Election Commission-i September 1 tashi mapang latetja alibaji anogoji ano atsü langjang ta mepishia liasü, saka taoba hopta Justice Surya Kant-i aniba Bench-i anogo atsü langtsü tsü memelung.

EC-i SC dang, September 1 sülen-a tashishiba lira agizü ktsü aser nominations

tatembangbuba anogo tashi nung aruba tashishibatem agizü ka voters' list nung zü ngoktsü, ta nangzü kba sülen September 1 nü Justice Surya Kant-i aniba Bench-i, "Draft roll nung tashishiba lira itemji nominations tatembangbuba anogo tashi nunga agizü ktsü," ta ashi.

SC-isa Bihar State Legal Services Authority dang online ajanga tashishiba agü tsüba agizü kba maparen nung voters aser party tem den yariteptsü atema para legal volunteers (PLVs) lemmzü kjang, ta tuyua liasü.

Ano külen osang ka ajanga ashiba agi, Election Commission-i linü k tesem ajaklen SIR mapatong benoktsü tebilemba lir. Iba dak sendakba nung EC-i September 10 nü state ajak nungi Chief Electoral Officers (CEO) senden ayongzü ka lir.

Delhi nung ayongzü kba senden nungji Chief Election Commissioner (CEC) Gyanesh Kumar, Election Commissioner ana aser tongti ketdangsertem adentsü.

PM Modi-i US osettsü set nung saru shilem 75 agitsü la: Arvind Kejriwal



Rajkot, September 07 (Agencies): Amongnü AAP tongti lenir, Arvind Kejriwal-i Ato kilonser Narendra Modi dang, nai tasü tait tanela sayua US nungi aruba osettsü set ajak nung saru shilem 75 agiang, ta mepishi.

Rajkot nung osangbenertem senden ka nung Kejriwal-i, "Centre sorkari taküm December 31 tashi US nungi aruba kü mba nung saru shilem 11 atoktsü telemtetba agiba ajanga India nung er kü mba lu ayimertem takoksa angutsü. Ibaji ajanga US nung er aluyimertem takar akü mtsü saka Gujarat nung aluyimrtembo sensaker akü mtsü," ta metetdaksü.

Kejriwal-isa, "Onoki Ato kilonser dang tasü tait tanela sayuang ta akhanger, kechiyong linü k nü burtem ajak nü den lir. America-i India nung er osettsü set nung saru shilem 50 benokogo. America nungi aruba osettsü set nung nai saru shilem 75 agitsü la, linü ki ibaji tizü ktsü melunga dang lir. Ibaji benokang, aser Trump-i (US Tir) apudaktsü asü mapudaktsü ar repranga lidi," ta metetdaksü.

Paisha Ato kilonser dang US nungi aruba kumba nung sayu

shilem 11 agitsü, Minimum Support Price latettsü, kü mba seret 20 shia sen 2,100 agi alizü ktsü, India nung er aluyimertem nem fertilizers aser metsü h atema subsidy agü jang, ta takhangba agü tsü.

Taoba mapang Delhi chief minister Kejriwal-isa, US-i India nung er osettsü set nung saru shilem 50 agiba ajanga 'diamond workers'-a mejungi kongshiogo, kechiyong Modi sorkari US Tir, Donald Trump matsü ngdang apudaker, ta ashi.

Gujarat nung Surendranagar district kü bok Chotila nung ayongzü kba aluyimertem senden 'Kisan Mahapanchayat' nung adentsü atema Kejriwal Gujarat-i ao, ajisü aka tzü nglu kanga aruba agi iba senden thinenogo.

Trump-i India anema saru shilem 50 benoker, saka Modi-ia US anema saru atutsü melen saru shilem 11 dang ajemogo (US nungi aruba kü mba nung saru shilem 11); kechiba Ato kilonseri apudaker?, ta Kejriwal-i asü ngdang.

Paisha, "Alima nung market tulutibaji India lir aser yangi aliba nü burtem Modi den lir. Pai (Trump) saru shilem 50 benokra Modi-i kü mba nung saru shilem 100 benoktsü la. Yamaji sü ra Trump-i apudakla. Trump ya tasü mait aser tetokdak nisung ka. America nung er company pezü shibangjang, yamaji sü ra parnoki timtem ajurutsü," ta metetdaksü.

Trump-i saru aika benokba linü ktemibo sashia telangzüba agü tsü ogo, ibayongji US Tiri apudaktsü sa akü m, ajisü aka India-ibo kecha meinyaker, ta paisha shisem.

Axis Bank Ltd.
A.C. Market, 4th Floor, 1, Shakespeare Sarani, Kolkata - 700071

Public Notice for – E-Auction of pledged assets being Gold

Talisa sen apurtem aser public dang ya sangdonger, tsü nglanglen aliba accounts tenü ng nung nangzü kba hon osettem Axis Bank-i tsü nglanglen shia aliba Branch nung public auction asü tsü, tsü nglanglen shia aliba sen apurtemi Axis Bank Limited dang gold ornaments ("Gold Loan Facility") kü bok loan facility agia Bank nem itemji security agü tsü.

Sen apurtem/Guarantors nem Demand Notice agü ja sen apurtem/Guarantors dang Gold loan facility agiba indang sentü h agü jang ta metetdakja liasü. Ajisü aka sen apurtem/Guarantors-i sentü hji magü tsü tet nung bank-i schedule of property nung shia aliba gold ornaments ji e-auction asü tsü sa akü mer. Auction ji 18-09-2025 (anogo) nung nikongdang **12.30 nungi 3.30** ako tsü ngda agitsü (e-auction mapang) aser ibaji "Kong allar yamaji", "Koma lidir yamaji", "Yangi aliba ajak" aser "No Recourse Basis" nung agitsü.

Sen apurtem aser sentü h osang tejangja

Branch Name	Customer Name	Loan A/C No.	Amount Outstanding	Date of Demand Notice	Gross Weight Grams	Net Weight Grams
DIMAPUR [NL]	NANDINI DUTTA	XXXXXXXXXXXX0405	117924	31-Jul-25	25.800	25.100
DIMAPUR [NL]	I MERENTEMJEN AO	XXXXXXXXXXXX7823	145590	7-Sep-24	41.500	29.880
DIMAPUR [NL]	VISAKONO SOLO	XXXXXXXXXXXX8990	50896	20-Nov-24	10.900	10.600
DIMAPUR [NL]	VISAKONO SOLO	XXXXXXXXXXXX8990	50896	20-Nov-24	10.900	10.600
LHOMITHI BAZAR NL	SURAJ RAI	XXXXXXXXXXXX4679	176302	16-Jun-25	37.400	33.300
PURANA BAZAR,DIMAPUR [NL]	RITSA L THONGRU	XXXXXXXXXXXX1921	158663	24-Mar-25	37.900	37.200
DIMAPUR [NL]	VIKALI WOTSA	XXXXXXXXXXXX0790	125872	26-Jul-22	26.000	25.000
DIMAPUR [NL]	VIKALI WOTSA	XXXXXXXXXXXX3057	228401	26-Jul-22	49.600	49.500

Jelia osang memetetdaksü account agientsü aser auction anogo melenshü tsü atema Axis Bank Ltd. daktashi lir. Auction ji online (website of online vendor) ajanga nikongdang **12.30 nungi 3.30** tashi agitsü (mapang). Telatetbatem osang tejangja atema agü ja aliba website nung reprangang _https://gold.samil.in (website of online vendor)

Date : 08.09.2025
Place : Kolkata

Authorized Officer,
Axis Bank Ltd.



TIR YIMYIM YIMOBILEM (EDITORIAL)

DIMAPUR MONNDAY, SEPTEMBER (RONGJUI) 08, 2025

Telinür o telinür na

Tang Naga Peoples' Front (NPF) aser Nationalist Democratic Progressive Party (NDPP) na ka kuma longjemmer alitsü mechi NPF teloki Nagaland Chief minister, Neiphiu Rio dang NDPP toktsür NPF dangi arung ta ajaba ya jepnüa alinung maoktsü amai lir, anungji telinür o telinür na ajuruteper amai asütsü. Atangji, NPF süli, NDPP süli Rio leniba nung tenzüka yimten teloktem lir, anungji NPF teloki ashiba ama, Rio NPF telok nung adenbaji pei ki tasenba toktsür tejenba nung alitsü asoshi meyipa aruba mapa ka asütsü. Aji oda, telong nung talitsü tak ta jembitepa yur asüngdang asünungji, yimya agi asüngdang masüngdang ka hai asübo mazü asüba agi, sobaliba yimya ka benschia tsürabur aser adianutem dang asüngdangtsü asoshi mapang tatsüka agir amai sayur dang ashi, memenui Rio dang masü saka NDPP pur ajak NPF akümtsü, anungji NDPP mali akümtsü aser NPF ulutsü. Aji tang anogo ishika tsünga ataloktsüba mapa ka lir. Iba ama, aika asoshi meimlaba osang ka angashidang, ano aika mulungjang nung kechiba tang ajungbenaka Rio-i NDPP dangbo NPF temeimba aküm (?) ta asüba kulijiang temetetnüba akümer. Atangji, tang government nung opposition mali, yimten telok balala nungi adoker ajak government nung dena lir, ibayongji Nagaland government ya opposition maliba, oppositionless government ta ajar aser government anokshitsüsa timtem agütsür-a mali. Ano, timtem agütsüdi asünunga, taküm küm tetenzüklen NCP MLA 7 NDPP telok nung adenba agi Nagaland tatar senden nung tatar 60 rongnungi NDPP MLA 32 lir, anungji tangar teloktemi yutsür aoyonga par telok nung tatar züngsem kija agi government bener aotsüsa nübo peria lir. Aji oda, NDPP o NPF na NPF kidang ka kuma longjemba agia parnok telok nung tatar züngsem 34 dang asütsü, kechiyong NPF telok tang tatar senden nung MLA ana dang lir. Ibaji kodang bilemdangdir, telok tuluba aser züngsem teimba aliba leni masü saka telok tilaba aser aser züngsem eshiba aliba telok nungang oa züklokbaji akhi yimya ama masü, yabo tebilemba, tangattetba aser yimya balaka nung inyaker ta reprangteter. Ashiko, Nagaland nung Regional teloksa asüyonga akhi mapang nungi aruba Regional telokjibo, tenüng melen dang ashi, NPF ya dang lir, iba jagi UDF,NDPP aser NPC mapang nung amshiba telok tamaitüsü noksa antepong amshir. Aji oda, Rio-a lanur asüba mapang UDF telok nung tir asüba otsü lir. Ajisüaka, ajak asoshi tia majung aser yimten tangattetba indang aika jembiyonga mazümazür kaji, Nagaland nungbo yinten yimsüsür tain ka ana dak alaka, ajak Naga Regional aser Indian National telok ana prongla nung yimten lenir aser yimsüsür südangba yimten lenirtem dang lir. Ibayongji, kasa nisungi khen khen 16 Point Agreement aitsüli aser ano khenkenbo 16 Point nung sangli ta koyatsü-angotsü ia sayur amai melentepa angur. Item rongnung Rio a ka lir. Aji oda, UDF nung Youth lenir aser Indian National Congress nung Home minister tashi inyakba nisungji pa lir. Aji oda, pai INC toktsütsüsa akümbaji, parnok mapang Chief minister, S.C.Jamir melena pa chief minister sünüba agi 16 Point Agreement ajungba indang kakat tilaka S.C.Jamiri züluba aija Congress toktsür, joko tambu Shorhozelie leniba nung NPC tasür lia, Rio-i NPC melen NPF aküm aser 2003 küm nungi NPF teloki yimsüsüa aru saka ano Shurhozeli lenisüba nung manidaktetba agi pai akümba NPF telok toktsür 2017 küm NDPP aküm aser 2018 küm nungi tang tashi NDPP teloki yimsü asür. Atangji, NDPP telok ya Rio kijai akümba telok ka masü saka talisa NDPP telok akümertem rongnung tongti lenirji Alemtemshi Jamir-a ka liasü, ajisüaka kodakirnaka ser NDPP telok tenzüksang tetsüti ana Rio o Alemtemshi na meputep aküm aser taoba election nung NDPP akümer Alemtemshi nem NDPP ticket magütsü, anungji Alemtemshii NDPP nungi pasasa anen, kechiyong iba ama mezüngmeshibaji pai magizüktet südi. Ashiko, iba amaji NDPP akümertem rongnunga jangramatem akümba agi Rio-ia NDPP maginü aküm asütsüa akok. Iba denji, ano Eastern Nagaland yimten jenjang ka latettsüba ken o tepdaka lir, aser ano kaji NPF yabo Naga nunger alidak tesem Manipur aser Arunachal nunga tenteta lir, anungji Naga yimten tsütsüa tesademba jembiteter. Atangji, telok ana longjemmer masü saka NDPP telok NPF nung adener, anungji NPF tiri pa menden azüngtettsütsü mulungtetbaji tenla tuluka asütsü, ajisüaka, ashiko, NDPP o NPF na longjemba agi Nagaland nung Naga Regional masü Indian National BJP aser Congress telokang tashitaitba akümtsüa akok.

OLEMSABANG

TAMANG NUNG AINBA

~ Mrs. Amenla Amlari (Source : Otongdar)

(Yashi adok nungi...)

3. Arakzüa Dang Alitsüla: Temang anema aser tashi ita alitsü aser tenük telen junga Alitstü asoshi arakzüa asentsü sendoka exercise agiba ama, khristan ka tamang nung anema aser tashi ita alitsü aser tamang aintsü asoshi tekülem kidangi oa Tsüngrem külemtsüji kanga dang tongtipang. Ibri 10:25 nung "Tekülem tetoktsü" ta dang shia lir.

Kechiaser tekülem kidangjiang Tanelar chiyongtsüji angur, "anungji tamangji tangashibanungi arur, aser tangashibaji Khrista indang sayutsungiba nungi arur". (Rom 10:17).

Iba den tekülem kidang tanen makai khrista den longjemba, sarasademba, Tsüngrem Obushiba ajanga dang tamang nung tabensaba kuma ainer.

4. Kibong Tajung Ka Nüngdaker: Taküm ka junga aintsü asoshi kibong ka nüngdaker, kong temeim, anepaluba, aria bilemba aser teyaritep agi sünga lir. Khristan taküm ka aintsü asoshia anepalur, temeimer, teyarir aser tenungiter kanga nüngdak. 1Tesalonikia 5:11 jagi ashir ... kati ka den ajungshitepang aser tashi itdakjang". Tashi mait aser mokokmeinba mapang nung nungitepba, ajungshitepba aser tashi itdakja telongjem nung lira, tamangertem tamang nung len mejemi aintsü. David-i ashi "Ajiang, adianutem külemi telongjem nung alitsü koda tajung aser jangrstemtsü lir....kechiyong yangji Kibubai temoatsü teti tatem maka taküm mela" T. ken 133:1 & 3b.

5. Temeket Temerük Asütsüla: Asen meketa aliba temenen aser memerükba companykoba ajanga Tanela nung tashi meiti kümdaktsür itemji paidoktsila,"... tamajung nungi jenang, saka temeshiba, Tsüngrem tsübuba temeim aser ajemalu item arishiang" (1 Tim 6:11). Temeket mopung koba memerük iba nungji dang asenoki alitsü merangra memeteti wara shira aser tashidak balalai meneptsü aser shirangdaktsütsü.

Khristan taküm ka kodang memerükba aser memeshiba mopung nungji lidir, memeteti mopung jagi bener oadoktsü aser tanela shirang tenzüksü aser tamang nung aintsü melen yareta rajangang akümtsü. Tsüngrem o-i ashir, Mashikoshi leman paidokang temenen nungi jena odi aser tamang nung anema lia aintsü merangdi.

6. Mapang aben Pei Tanela Taküm Tendangtsüla: II Korint 13:5 "Nenok tamang nungali asü mali tendangang". Shi temang nung mapang aben doctor dangi oa temang repranger aser mokokmein aser tashi mait lira mozü anepalua agiba ama Tanela takümnung mapang aben asen tamang jenjang koba tashi nung lir, koba nung yanglushitsü, aser kong yanglushitsü ta asadangtsü nüngdaker. Yamaji tamang jenjang asoshi bushisüngdanga inyakra memeteti dang tabensaba nung tamang inloker alitsü.

Hau, tamang nung aintsübaji kenü mapa masü, mesüra inyakba agi aintsüi ta masu, saka tamang nung ainba yabo tanen maka inyaktsü wadang ta angatetdi. Amangbapurtem, asenok ya tanur ama dang alitsü asoshi yangluba mas?, saka anogoshia Khrista mesüka aintsü asoshi yanglu asünung, anogoshia terara inloka tamang nung teperangba aser tashi taitba nung aintsü merangdi. Kechiaser Tsüngrem o-i ashir, "aser tamang medenra, Tsüngrem mulung chidaktsütsü makok...(Ibri 10: 6)".

TAMANG SOBUTSÜ TENET

- * Ochi agi nangri akangtsü.
- * Temeshiba merang semoktsü.
- * Tesünep osangtajung terenemba tsüngsem.
- * Tamang Jong.
- * Tekümtet merang korang.
- * Tanüla nok.
- * Sarasadem aser temepishiba.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Assam Valley Baptist Asso nung Ex. Secy Huni Gogoi ordain süogo



September 07, 2025 nü Nakachari Ao Baptist Church (NABC) nung Assam Valley Baptist Association (AVBA) nung Executive Secretary, Huni Gogoi 'ordain' asüba sentong agiba sülen tangokba noksa nung angur. Huni Gogoi (tejaklen ajichilen nungi tasembuba).

Nakachari (Jorhat District), September 07 (TYO): September 07, 2025 nü Nakachari Ao Baptist Church (NABC) nung Assam Valley Baptist Association (AVBA) nung Executive Secretary, Huni Gogoi 'ordain' asüba sentong agiogo, ta Assam Valley Baptist Association Tir, Er. Temsu Wathi-i sangdong ka nung metetdaksü.

World War I sülen Naga Labour Corp (NLC) kübok Naga nung sepaitem aika meyipa aruba Nakachari area nung ali. Ano World War II sülen-a NLC nungi sepaitem aika meyipa aruba sülen Nakachari nung ali.

1946 küm Ao Naga nungertemi Nakachari Ao Baptist Church tenzüka liasü aser 1962 küm nung Ao Baptist Arogo Mungdang (ABAM) nung aden, aser ibaji ajanga lenden lima nungi mezüng ABAM kübok affiliate asüba Arogo aküm.

1996 küm Arogo Golden Jubilee amongba mapang nung lenden lima (plain sector) nung aliba Baptist Arogotem arangshitsütsü aser anitettsü atema Mission field ka amenoktsü telemtetba agia liasü. Ibaji ataloktsü atema Arogoi Huni Gogoi Impur Bible School nung training agidaksü. Pai Assamese oshi dang masü saka Ao oshia junga jembir.

Pa 1985 küm nungi 1999 küm tashi Sibsagar Baptist Association nung inyak aser Yajang-C Baptist Arogoi pa sponsor süa liasü. Iba sülen 2000 küm January ita nunga pa Nakachari Ao Baptist Church nung pastor inyak. Iba sülen küm ka dang lirbo ABAM-i pa nem Christian Minister License agüja liasü.

Anungji ABAM kübok Ao Arogo ka nung Assamese Pastor mezüngbubaji Huni aküm. Tesülen NABC aser Pastor Mr. Huni na lenisüba nung 2005 küm Assam Valley Baptist Mission (AVBM) tentet aser AVBM kübok Baptist Arogo 27 lir.

2011 küm Pastor Huni AVBM nung inyaker.

Küm 20 tashi kanga meranga inyakba sülen ano wadang tuluba inyaktsü atema iba Mission ya AVBM 'upgrade' süa 2024 küm July ita nung full-fledged Association ka aküm aser nüngjaji Assam Valley Baptist Association ta melen. Tang AVBA ya United Baptist Churches Convention (UBCC), HQ: Dimapur nung affiliate süa lir.

UBCC Ordination Committee nung züngsemtemji Rev. Dr. Rabi Pame, Rev. Dr. Sahingmak Newme aser Rev. Y. T. Lotha nung liasü aser Rev. Dr. Rabi Pame-i ketdangsüa Huni Gogoi ordain sütsüogo.

Iba sentong ya Nakachari Ao Baptist Church nung pastor,

Limaakum leniba nung agi aser Gogoi-i Tsüngrem tajaba kuli lemsatep. NABC nung deacon Tarun Deb, AVBA Tir Er. Temsu Wathi aser UBCC nungi Rev. Dr. Sahingmak Newme nungeri kuli asütsü.

ABAM Literature Secretary, Rev. Dr. Moa Tzudir aser Kumlong Baptist Arogo nung pastor Kikum Longkumer nati salem osang lemsatepa liasü.

Tesüsa Huni Gogi-i ketdangsüa pa den pastor pezüi yaritepa Kibuba Benjung agia liasü. Iba sentong nung Rev. Dr. Takatemjen aser pa kinüngtsü na den jala-a aden.

Rev. Dr. Rabi Pame-i sarasadema sentong tembangba sülen lokti chiyunga liasü.

Nigeria nung Khristantem tepsetba anentsü lanurtemi akhanger

September 07, 2025: Tawa Plateau state aser Kaduna state na nung Khristantem aika tepsetba sülen Nigeria nung Khristan lanur lenirtemi sorkar dang lisopur Khristantem tepsetba anentsü atema inyaktsü takhangba agütsüogo.

August 29, 2025 nü Jos nung osangbenertem senden ka nung jembidang Universal Reformed Christian Church (NKST), Church of Christ in Nations (COCIN), Evangelical Church Winning All (ECWA) aser Youth Wing of Christian Association of Nigeria (YOWICAN) nungi lanurtemi, Nigeria nung asalentong yanglur Khristantem jenti tepseter, ta metetdaksü.

Parnokisa, sepai ketdangsertemi aiben takoksa angurtem aser mejangjaba teloktem nungi züngsemtem tsünga senden ayongzüker, ta metetdaksü.

Sepaitemi "mejangjaba teloktem" ta ashir, ajisüaka takoksa angur Khristantemibo item nisungtemji Funali Muslim nungertem lir ta ashir.

"Item ama sendenji yimjung atema ayongzüka masü saka aibelenertem jungkai madoktsütsü atema ayongzüka lir," ta Rev. Jethro Moor-i metetdaksü.

Paisa, "Onok yimtsüngtem kümzüksü memelungba kasa sepai ketdangsertemi onok

jaoker aser mejangjaba prangpong amer nisungtem denji salemdaksür. Iba sülen Abuja aser Washington dang tesem nung yimjung lir ta ashir. Ajisüaka ozü nüburtem (Khristantem) maneni tepseter aser aika prokshir," ta metetdaksü.

"Item ama taila yimjung sendenji aiben ayongzüka amener. Plateau aser Kaduna state nung lendong nungi jenburtemi item ama tatalokba ya 2018 küm nungi tenzüka shiogo. Plateau state kübok nisung 200 dak tema tepsetba sülen-a security agency temi senden ka ayongzüka liasü," ta paisa metetdaksü.

Yamaji 2020 küm April ita nung COVID-19 lockdown mapang nunga Kaduna state kübok Kajuru nung Khristan aika tepset, iba mapang nungjagi tenzüka tesüiba küm pongu tsünga Khristan noklang aika tepsetogo.

2023 küm August ita nunga Plateau state nung Bokkos Local Government Area amakdang Khristan aika tepset.

Item ama tatalokba sülen ketdangsertemi Khristan lenirtem-a jaoka senden ayongzüka akar, iba sülen tensa tajungba kümдар ta sangdonger, ta Khristan lenirtemi metetdaksü.

Tang tesüsa August 24 nü

ANOGO ABEN TSÜNGREM DEN

Tsüngrem amatokba

"Kibuba ne Tsüngrem mamatsü kümdangang; kodang na tepok sünga chir, aser talitsü ki yanglur, aser ne nashi telok aser san telok renlokdir, aser ne taribi aser hon rena kümdir, aser na akaba ajak renloka kümdir; ... idangji kümdangang" (T. Kunem 11-17).

Nisung tajung ki tajung nung alir ka dang azü ki tila ka nung alir kati asüngdang. "Nai chuba kiji angu asu? Aser pai langzü, "tsüngküm mapang kodang süngo tuo ajak süngdong nungi jetzükdir idangji chuba ki kanga junga angur. Meyi mapang nung süngo tuo agi nembanger kiji mangur, tsüngküm takong mapang kiji jungkai adoker! Yamaji tatem nunga alir. Peria aliba mapang takdang teperi aliba kiji asenoki mangur, aser aseni ki kibur asen Kibur aser Tsüngrem amatoker. Aseni ali rongsen agi tatem maka rongsenji nembanger.

Peria akaba mapang aseni kechi inyaktsüla? Tenük agi anguba rongsenji tenokdangba mekümdaktsütsü aseni sarasademtsüla, tanguba rongsen ajanga manguba rongsen angutsu aseni sarasademtsula. Ibai tanela sempet lir, aser aji asenok meyong. Pai asenok tenük nung taochi mozü nütsütsü, aser ali rongsen peria akaba mapang asen mulungjangi kotak nung aliba rongsenji angutsü. Ajak asenoki jangjaa angutsu.

Kaduna state kübok Kamaru nung Khristan tenet tepset aser 12 yiruja liasü. August ita tomle-a Plateau state kübok Bassa nung Khristan 6 tepseta liasü.

Item tatalokba ajakji shisadanga, Islamic telok balalai Khristan yimtsüngtem aser Khristantem amakba mapang nung sepai marur, saka anogo ka lir dang sepaitemji arur. Aibelenertem bushitsü atema masü saka senden ayongzüka amentsü atema dang sepaitemji arur, ta Khristan lenirtemi metetdaksü.

Khristan lanur lenirtem jagisa, item ama tatalokba sülen ghonda 72 tsünga sepai ketdangsertemi Arogo nung lenirtem dang senden nung adentsü metetdaksür, ta ashi.

"Sepai ketdangsertemi onok dang aibelenertem dangji tai tokang ta ashir, saka aibelenertemji shirnok? tabo masüngdang. Parnok tebilembaji onok den külemi noksa tangoktsü aser Abuja aser US embassy dang item tesem nung yimjung lir ta ashitsü atema lir," ta Bassa amakdang asür ka adianui metetdaksü.

Taoba hopta Jos nung ayongzüka osangbenertem senden nungji Khristan lanur tentet balala nungi lenirtemi sorkar ketdangsertem dang

rara nokdangba den külemi osang tai prokba anenang, ta takhangba agütsü.

Parnokisa, Khristan jenti tepsetba ya yimsü nung ajemdaker asalentong yanglur inyakba lir ta official süa agizüktsüla, ta takhangba agütsü.

Khristan lanurtemisa, rara ajanga prokshia aliba Khristantem pei kidangi tanaben meyipa aotsüsa inyakang, aibelenertem puang aser temerenshi agüjang, ta takhangba agütsü.

Parnokisa sorkar dang, pei mapa shidak meinyakba sepaitem anenjang aser ochi kulitem nokdangtsü meranga security agencies anema bushisüngdangang, ta takhangba agütsü.

Khristan lenir kati, "Khristantem million aika camps nung jenoka lir, aser parnok meyong alibo tangari atsünga agiogo. Ajisüaka sorkari senden maneni ayongzüker aser alima dang ajak junga lir amai sayutsü meranger. Onoki ochi temeden aginer," ta metetdaksü.

International Christian Concern (ICC)-i ashiba agi, taküm January ita nungi tenzüka tanü tashi nung Nigeria kübok Plateau, Benue aser Kaduna state tem nung Khristan 4,000 dak tali tepsetogo.

AO OSHI ANGAZÜKDAK:**TANÜ ANGAZÜKTSÜBA OJANG****Tetsü**

(n) tangar ojala ka tetsü, otsüla (grandmother in third person)

* Par tetsü meranga inyakba tsürabur ka liasü.

Tetsübu

(adv) tasümaait aküm, ajema ait (fear)

*Tetsübu nung nisung ajak jena ao.



Tir Yimyim

OLONG PAITEP # 7264

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

TIPIEN

2. Teburtemi tejak nung awaba

- (8)

6. T _ _ _ em

- (3)

8. Tzüak ayudak

- (3)

9. Nüngdakba dang timba

- (6)

11. Züina ao

- (4)

12. Yangi tzü angur

- (5)

14. Tangar dang nungi tali

- (4)

16. Senyong masü

- (6)

17. Oadokdi

- (3)

18. Tzü tarok

- (3)

19. Yimtaklir aikati iba ya ki den

- (8)

külemi yanglusemer

LANGTSÜNGLEN

1. Temejangdak

- (6)

3. Nisung ka mapa inyaktsü nübo

- (4)

4. Azüntsü asoshi mejemba

- (6)

5. Tesangwa agütsüba

- (5)

7. Tila masü

- (4)

10. Tebenjem tetsür chanu

- (4)

11. Tekolak nung inok

- (4)

12. Tetsüngda

- (6)

13. Tangar inyakba ka inyak

- (6)

14. Tim masü ta ashi

- (5)

15. Asalendong

- (4)

16. Tanüdagtsü

- (4)

OLONG PAITEP # 7263 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,

5. Lenti, 7. Tajangzük,

11. Teronem, 12. Sempa,

13. Jahaz.

NAI-A YA METETTER MA

Alima nung azü tebongtem rongnung tar talangtibaji US nungi Kevin ta ser Great Dane ka liasü. June 2024 nung Guinness World Records (GWR) ajanga iba kuli agütsü aser Kevin tarji 0.97 m (3 ft 2 in) liasü. Ajisüaka iba kuli anguba sülen anogo ishika dang lir Kevin asü.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Manipur Governor-i PM Modi sentong atema senden ayong

Prime Minister Narendra Modi-i tan September ita tomten Manipur semdangtsü sentong aliba dak sendakba maparen renemshiba noksa nung angur.

Guwahati, September 7, 2025 (Agencies):

Prime Minister Narendra Modi-i tan September ita tomten Manipur semdangtsü sentong aliba atema Governor Ajay Kumar Bhalla-i Deobarnü Raj Bhavan nung senden ka ayonga menogo.

Iba senden nung taoba Chief Minister N. Biren Singh densema tongtipang ketdangsurtem aser BJP lennirtem aden.

May 2023 nungi kin o kin

tsüingda rara adoker mepetmesütepa aruba mapang PM Modi-i Manipur semdangtsü.

Iba senden nung Chief Secretary Puneet Kumar Goel, Security Advisor Kuldiep Singh, aser Director General of Police Rajiv Singh nunger den State BJP president A. Sharda Devi aden.

Prime Minister Modi-i semdangtsü indang 'formal announcement' kecha mali saka

osang angazükba agi pai September 13 nü Mizoram semdanga Bairabi-Sairang railway project lapoktsütsü.

Iba sülen pai Imphal semdangtsü ta angazüker saka iba dak sendakba osang tejangja kecha mali.

May 3, 2023 nungi Manipur nung Meitei aser Kuki-Zo nunger tsüingda rarayonga arudang nisung 260 tema taküm samaogo aser meyrjang aika pei talidak toktsür ogo.

Tipra Motha-i Delhi nung 'Greater Tipraland' atema lungkak aittsü**Agartala, September 7, 2025 (Agencies):**

Tripura nung BJP den yaritepa Tipra Motha Party-i September 9 nü New Delhi nung lungkak aitba sentong agitsü.

Centre dang küm ka tejakdang nangzükbatem inyakang ta rongshia parnoki Jantar Mantar nung iba sentong agitsü renema lir.

Tipra Motha-i 'Greater Tipraland', Tiprasa Accord mapa akümtsü aser Tripura

nungi ozüing alema arurtem meyipa yoktsü akhanger.

Tiprasa Accord ya Union Home Minister Amit Shah lia March 2024 nung sign sütep aser iba nung state nung lisopurtem dak sendakba onüktem benoka lir.

Tiprasa Accord sign sütepba sülen mapa inyakba mali aser iba ajanga lisopurtem taginübatem matong lir ta Tipra Motha lennirtemi ashir.

Tipra Motha tanishisang

Pradyot Debbarma-i anir New Delhi nung lungkak aittang state ministers, MLAs, aser Tripura Tribal Areas Autonomous District Council (TTAADC) tanishirtem adentsü.

Iba sentong party lennir David Murasingh adentsü. Pai Agartala nungi Delhi tashi kilometer 2,500 jajaogo aser iba ya Tripura nung nisung aika ozüing alema aruba osang metetdaksütsü atema liasü.

CM Khandu-i 1962 war nung taküm bendanga agütsürtem tushi**Guwahati, September 7, 2025 (Agencies):**

1962 India-China War nung taküm bendanga agütsür nem Arunachal Pradesh Chief Minister Pema Khandu-i tetushi agütsüogo.

Arunachal kübok Anjaw district nung aliba Helmet Top War Memorial, Walong nung CM Khandu-i Indian Army nem tetushi agütsü.

Sepaitemi iba rara nung India asoshi taküm bendanga agütsüba atema tushir ta pai ashi.

Border Roads Organisation (BRO) personnel ajanga December 1986 nü ngutetba sülen Helmet Top War Memorial tenüing jalokja liasü.

BRO personnel-i iba tesem nung mapa inyakdang sepai ka tasümaang den helmets 24 nguteta liasü. Iba jagi Battle of Walong nung raraba sepaitem nem tetushi agüja iba memorial yanglu.

CM Khandu-isa 6 Kumaon Regiment nungi Lieutenant Bikram Singh Rathore nem tetushi agütsü. Lieutenant Singh

ya iba rara nung November 16, 1962 nü asü.

Lt. Singh-i sepai 120 anir Namti Nullah kümzüka ayutsü atema rara aser idangji tsükchir aika tepset.

Iba memorial ajanga sepaitemi India kümzüka ayuba bilemtetdaksür ta Chief Minister Khandu-isa ashi.

Prime Minister Narendra Modi lenisüba kübok India arrtsütem akangshiogo aser 1962 mapang dang nungi tashitaitba kümogo ta Khandu-isa ashi.

Japan Ato Kilonser Shigeru Ishiba-i mapa yutsür

Tokyo, Rongjui/Sept. 07 (Agencies): July ita parliamentary election nung tamakok anguba tenüing agitsü külem party nungi ola adokba sülenJapanAto Kilonser Shigeru Ishiba-i mapa nungi anentsü ta Deobarnü sangdongogo.

October ita Japan ato kilonser akumsang Ishiba-i pa ato kilonser aser par Liberal Democratic Party indang tekolakba ama mapa yutsütsü ta ashi.

Arishi küm 68 tain moderate centrist Ishiba yagi par party nung kari ato kilonser menden nungi alutsü akhangba memulungi aru. US tariffs, osettsüset nung jenjang timba akumba aser Asia-Pacific nung tensa tamajungba akumba densema domestic aser international jenjang nung Japan tetsükdaksü balala ajurua aliba mapang yimtenren tsütsü tazüingla ka madokdaksüner ta pai shia liasü.

Deobar aonung osangbener senden ka nung pa mapa yutsütsü sentong sangdongba mapang, meyi mapang election nung par party-i tamakok ajuruba khuret pai abentsü bilema aru saka United States

den tariff ken o jembiba nung terenlok mezüing südaksünü ta rasaa ashi. Pai iba ya linük tejangraba lir ta ashi.

"Lenir mapa yutsür indang sorkar den shibai süoki ia jembishinü akatsü?" ta Ishiba-i ashi.

Japan nunger gari aser danga oset nung taoba mapang tariff shilem 25 meshia aliba ajema shilem 15 meshitsü US Tir Donald Trump-i Hokulbarnü totuyuba agütsüba sülen pa mapa nungi anentsü mapang atong ta ashi.

"US tariff ken o jembiba nung alizüing ka atongba sülen, temelener nem lenmang lapoktsütsü mapang tongogo ta ni telemtetba agi," ta Ishiba-i ashi.

Par party nung lenir tasen shimtsü asoshi election agitsü asü masü ta par party-i telemtetba agitsü anogo ka lia pa mapa nungi anener, koba ajanga pa anema no-confidence motion agitsü liasü.

Iba mera magidaksütsü mechi ni temulung shiranga mapa nungi anentsü telemtetba agi, kechiaser ibaji ajanga party nung telemsa adoktsü aser ni iba tebilemba nung masü, ta ashi.

Ishiba-i pa melentsü asoshi party lenir shimtsü atema vote agitsü maparen tenzüksü ta ashi, koba October nung agitsü imlar. Party lenir tase ka shima parliament-i magizük tashi pa ato kilonser ama inyaka alitsü.

Mapa tembanga meinyak yutsüba asoshi sasa bilemaka ni metokteptsü, ta ashi.

July ita parliamentary election nung Ishiba'er ruling coalition yagi menden 248 aliba upper house nung majority mongutet, anungji par sorkar tashi meiti akum. Iba sülen Ishiba ato kilonser kumer hopta ana dang lir October ita tashi tuluba aliba lower house nung par teloki aniba coalition-i majority mongutet.

Iba tamakok sülen Liberal Democratic Party ajanga taoba hopta party nung temelenshi alitsü akhangba sülen Ishiba mapa nungi anentsü akhangba tali akum.

Pa melentsü asoshi candidate tem rongnung Agriculture Minister Shinjiro Koizumi, taoba Economic Security Minister Sanae Takaichi aser Chief Cabinet Secretary Yoshimasa Hayashi nungertemi tokteptsü imlar.

Venezuelan jets temi US rong nem timtem agütsüra khazüka yoktsü: Trump

Washington, Rongjui/Sept. 07 (Agencies): Venezuelan jets tem US naval ships anasa senzüra aser onok lendong ajurutsüsa jenjang nung yutsüra itemji khazüka yoktsü, ta US Tir Donald Trump-i tekum dangtsü ashi.

Anogo ana nung tanaben South America anasa US rong ka anasa Venezuela military aircraft yima aoba sülen US tir-i iba tekum dangtsü o ya ashi.

Gang temi Venezuela nungi temesepba mozü bener arua aliba rong ka US-i amak dang nisung 11 tepsetba sülen iba osang ya arur.

US-i ozü linük dak tai tongloksüba ya tai lir aser linüktem tsüingta tebila aliba ya "military conflict" ta ashitsü makok, ta Venezuelan Tir Nicolás Maduro-i shia lir.

"Venezuela-i teti jembishinü akatsü mulunga lir, saka onok akumtsübotsüla," ta pai ashi.

Hokulbarnü Oval Office nung osangbeneri, Venezuelan jets tem US indang rong anasa yima senzüra kechi asütsü ta asüing dang dang, "Venezuela timtem asütsü," ta Trump-i langzü.

Pa anasa nokdaka aliba general tem dang, tensa tamajungba kumra pai kechi inyakner inyaktsü, ta Trump-i ashi.

January ita tanaben US tir akumba sülen Trump-i meilongi süaka Latin America nung temesepba mozü anema nokdaker.

Ajisüaka Maduro-ibo US-i mitkar tashi amshia yimden melentsü meranger, ta aitsür.

Iba indang asüing dang dang, "Asenok iba indangji jembir masü, saka Venezuela nung election balaka agi,"ta Trump-i ashi. Mangatetep aliba election ka agiba sülen Maduro ya January ita ang kümsük tasembuba tir inyaktsü tenangzüka agia liasü.

Venezuela nungi temesepba mozü tem US-i kanga aiter aer yangji Tren de Aragua züingsemtem alir, ta Trump-i ashi. Tren de Aragua ya US nungbo kiralongraba telok ka ta sangdonga lir.

US mitkartem southern Caribbean nung ulushitsü mera agiogo, kong temesepba mozü bener aitba azüoktsü mechi naval vessels talila aser marines

aser sailors meyirijang aika yoksema lir.

Hokulbarnü White House-i Puerto Rico leni F-35 fighter jets 10 yoker ta ashi.

Caribbean nung mitkar sashia akumba indang asüing dang dang, "Asenok temesepba mozü anema tashi ita nokdaker. Temesepba mozü nem asen nübur metepsetdaksüner," ta Trump-i langzü.

Trump ya mapang talangka nungi Maduro anemer ka lir aser pa aputsüsa osang agütsür nem sen \$50 million agütsütsü August ita sangdong aser Maduro ya alima nung temesepba mozü shibelener tulutiba rongnung ka lir ta tai tongloksü.

Russia-i Kyiv amak; nisung 3 tepset, 18 yirutsü

Kyiv, Rongjui/September 7 (Agencies): Russia-i drone aser missile amshia Ukraine yimtiba Kyiv amakba sülen nisung asem tepset aser nisung 18 yirutsüba den sorkar ki densema ki aika raksatsüogo, ta ketdangsurtem aser local osang kaket ajanga metetdaksü.

Ukraine-i ashiba agi, Russia-i Deobar anepdang tashi nung drone aser decoy 805 aser missile 13 yoka liasü. Rara tenzükbba sülen tang drone timba amshia Ukrine makogo, ta Ukraine Air Force otongdar Yuriy Ihnat-i Associated Press news agency dang ashi.

Kyiv Mayor Vitali Klitschko-i ashiba agi, Deobar anepdang kinü tanur ka aser aiür chanu ka tepset aser yimti anütok aser anüolen kitem nung mi adoka

liasü, ta Reuters news agency-i metetdaksü.

Kyiv indang yimti administration tekolakba Tymur Tkachenko-i mapang tatsüka lir, arishi küm 1 tain tanur ka tsü mang teküzmükertemi ki ajareper aliba nungi agitetogo, ta metetdaksü.

Dnipro ayong anütoklen Darnytskyi district nung pezüben atongtepa tua sür aliba ki ka nung drone teraksa arua tsüka mi adokba sülen medic tem jaoka liasü, ta Klitschko-i metetdaksü.

Drone teraksa agisa Kyiv anüolen Sviatoshynskyi district nung 16-storey ki ka aser nine-storey ki ana nung mi adokdakja laisü.

Tenük kuli agütsürtemi Reuters dang ashiba agi,



Kiphire Town Ao Baptist Church

Kiphire: Nagaland

P.O. Kiphire: 798611.

Phone No. +919862308013

"The Grace of the Lord Jesus be with You." I Corinthian 16:23

TEMEPISHIBA KA SANGDONGER

KTABA Golden Jubilee (2027) Otsü tejangjaba ayutsü atema, Anogo balala nungi, KTABA nung, September 2002 tashi Tenzüker aser December 2011 tetsüingda nung, Tenzükba mapa balala nung tenzüker anenertem ajak dangi temepishiba ka iba sangdong ajanga mepishir. Nenok timtem agiaka, nenoki KTABA mapa balala nung tenzükbba kuli kaket (Certificate), KTABA-i agütsüba to tangoka, item WhatsApp No. 9612570016, 9089109973, 9862308013, ka nung yoktsü mepishir. Kar alima nungi oadoker mesüra makokerbo chirnurtemi yaritsü mepishir. Kanga Pelar.

Sd/-

(Mrs. LIMASENLA LKR)

Convener.

KTABA OTSU LUDEN.

Kiphire: Nagaland

Sd/-

(Dr. TEMJENTOSHIOZUKUM)

Secretary.

KTABA OTSU LUDEN.

Kiphire: Nagaland

JAMIR KIDONG

MOKOKCHUNG VILLAGE

TENÜNGSANG ASER TETUSHI AGÜTSÜR

Shri. N. Bendang Jamir aser Mrs. A. Chubala Lkr na jabaso Shri. Moaküzmük Jamir, shibai Nagaland Public Service Commission (NPSC) ajanga agiba NCS 2024 final result dt. 03-09-2025 nung Commercial State Tax Officer (Class-II Gazetted) Taxes Dept nung 8th rank jenjang ngutetogo, pa nem Jamir kidong Mokokchung village ajanga kangasa pelaba den tenüngsang aser tetushi tulu agütsür.

Tsüingremi techir taküm temoatsüba nung len aniangma.

Sd/-

Jamir Kidong Mokokchung Village tenüing nung,

1. R. Kilen Jamir (Tatar)

2. Akangsowa Jamir

3. Longritemjen Jamir

4. L. Tiatemsü Jamir

Oleplang

Tir Yimyim adok 311, 25th August 2025 Page 7 aser Tir Yimyim adok 312, 26th August 2025 page 7 nung sangdonger ta sür Mangmetong 'A' Khel Senso Mungdangi adoktsüba yamai meyiptsür.

Ni Mr. Temjennungsang S/o. Lt. Longkoktiba Kumlong ward-i Mangmetong 'A' Khel Senso raising fund sen lakh 2 apua aliba lakh 15 agütsüa aruogo.

Anungji koba 22-8-2025 anogo Mangmetong 'A' Khel Senso lenla senden-i telemtetba agiogo ibaji ni magizüker.



Temjennungsang Kichu, Chungtia

Kumlong Ward.

parnoki yimti nung bomb ishika apokba angashi, koba air defence unit tem inyaksangshiba mesüka liasü.

Ukrainian news website Kyiv Independent-ia, yimti kübok Darnytskyi district nung tejenokdak ka nung tantsür ka asüba metetdaksüogo, ajisüaka la kechi agi asü ajibo mejangja.

State emergency service-i Kyiv nung nisung ka asüba aser nisung 18 yiruba jangjtsüogo.

Drone aser missile temi yimti amakba mapang yimti nung power supply raksatsü aser Ukraine indang cabinet kilem nungi mi adoka liasü, kobng minister tem indang office lir.

"Tang mezüingbuba tsükchirtemi amakba mapang sorkar ki ka raksaogo, kong

kilem aser temaba floor densema lir," ta Ukraine Ato Kilonser Yulia Svyrydenko-i ashi, "Onoki kibo yanglushitettsü, saka nisung taküm samababo meyipa bener marutettsü," ta Yulia-i shisem.

"Alimai iba teraksatsüba bener arutsüba atema o agi dang masü saka mapa agi telangzüba agütsütsüla. Russia indang totzü aser gas atema tenokdangba tali agütsütsü nongshitsüla," ta lai ashi.

United States tir Donald Trump-i küm asem rara ya anendaksütsü atema jenjang taliba agiba mapang Russia-i asendenshir tawa Ukraine aiben maka arudar. Ajisüaka US tiri jenjang agiba ya tang tashibo takok nguteta mali.

(Maneni tapak 8 nung...)

Aryna Sabalenka-i US Open tetsür kija asaya kokogo



Rongjui/September 7

(Agencies): US Open tetsür kija asaya final nung World number one Aryna Sabalenka-i America tsür Amanda Anisimova straight sets nung koka la indang career nung Grand Slam pezübuba kokogo.

Arthur Ashe Stadium nung final asaya nung Anisimova-i serve junga moteti asayaba maongka agia Sabalenka-i kanga sashia attack süa asaya aser 6-3, 7-6 (7/3) agi asaya koka liasü.

Australia aser French Open final nung tamakok anguba sülen arishi küm 27 tain Belarus tsür la yagi Honibarnü final asaya ya 2025 küm la asoshi

Grand Slam ka akoktsü atema tatembangbuba maongka asütsü ta meteta asaya liasü.

Anisimova ya ita ana tejakdang Wimbledon final nunga Iga Swiatek-i 6-0, 6-0 agi koka liasü.

Anisimova aser Sabalenka na tekuben asayaba Anisimova-i trokbenbo koker liasü, kong Wimbledon semi-finals nung takok anguba densema lir.

Ajisüaka Sabalenka shiba la indang career nung Grand Slam final tenetbuba nung asaya liasü, lai la tajangshibatam ajak bener arua asaya aser Anisimova mezügbuba Grand Slam akoktsü atema nükjidong

aliba amajok kümdaktsüogo.

Asaya mezügbuba set nung Anisimova-i break points asem anguba magitetba sülen Sabalenka 2-0 agi tejakdang aküm

Ajisüaka Anisimova-i tasembuba game nung break point ka angu aser pai iba maongka ya agiteta 2-2 ta kasasa aküm.

Iba sülen Anisimova-i ano serve ka break asü aser la 3-2 agi tejakdang aküm. Ajisüaka taruba game ya Sabalenka-i love nung break süa liasü. Game tibuba nung Anisimova-i service junga moteti double-fault anaben mena aser Sabalenka nem break point ana agütsü, koba lai aibelen mesüi agi aser mezügbuba set akok.

Tanabuba set nung Sabalenka-i tajungba asaya tenzük aser la 3-1 agi tejakdang aküm. Ajisüaka Anisimova-i la indang serve merakzükdaktsüba den Sabalenka indang serve ka break süa 3-3 aküm.

Asayar anaprongla ka nem dang amokbanger masayadaktsüi asayayonga tur külen tiebreak asayatsüsa aküm. Tiebreak asayaba mapang Sabalenka yakta dang dang 6-1 agi tejakdang aküm aser lai asaya koka liasü.

Tetsür World Cup lapokba sentong nung Pakistan-i shilem magitsü

Rongjui/September 7, 2025

(Agencies): Pakistan-i September 30 nü Guwahati nung ICC Women's World Cup lapokba sentong nung shilem magitsü telemtetba agiogo, ta Pakistani news outlet Geo Super-i sangdong ka ajanga metetdaktsü.

Asayamung lapokba sentong nung India nung nüngtugu kentener Shreya Ghoshal-i shilem agitsü aser iba sülen co-hosts India aser Sri Lanka na mezügbuba asaya asayatsü.

Geo News, nung source temi ashiba agi, Pakistan captain Fatima Sana mesüra team nungi representative ka danga iba sentong asoshi India-i marutsü.

Pakistan aser India na tawa mangatetep adoker aliba den

iba telemtetba agiba ya sendaka alitsü ta bilemer. Linük anapronglai taruba küm asem atema ICC asayamungtem asoshi kati ka arrtsü adena maotsü mulungtepogo.

Taküm küm tetenzüklen India-i Pakistan nung ayongzüka asayaba Champions Trophy nung shilem magitsü telemtetba agia liasü.

Tetsür WC nung Pakistan team asaya ajak R Premadasa Stadium, Colombo nung asayatsü.

Pakistan qualify süra iba tesem nungsa October 29 nü semi-final aser November 21 nü final asayatsü. Parnok mezügbuba asaya October 2 nü Bangladesh den asayatsü.

Iba asayamung nung Pakistan aser India na October 5 nü asayatsü.

ICC Women's World Cup 2025 atema Pakistan squad: Fatima Sana (c), Muneeba Ali Siddiqui (vc), Aliya Riaz, Diana Baig, Eyman Fatima, Nashra Sundhu, Natalia Parvaiz, Omaidha Sohail, Rameen Shamim, Sadaf Shamas, Sadia Iqbal, Shawaal Zulfiqar, Sidra Amin, Sidra Nawaz (wicket-keeper) aser Syeda Aroob Shah.

Non-travelling reserves: Gull Feroza, Najiha Alvi, Tuba Hassan, Umm-e-Hani aser Waheeda Akhtar.

ICC Women's ODI World Cup Qualifiers nung kanga junga asayaba sülen Pakistan team World Cup atema qualify süogo. Pakistan nung qualifying asayamung ayongzüka asaya aser parnoki asaya ponguprongla koka liasü.

Dembele aser Doue naprongla yirur ita ka masayatettsü

Rongjui/September 7, 2025

(Agencies): European champions Paris St-Germain nungi asayar Ousmane Dembele aser Desire Doue na France team World Cup qualifying nung Ukraine akokba asaya nung yiruba sülen October ita tashi masayatettsü.

Dembele hamstring kanga mejungi yiruba sülen hopta trok shi masayatettsü aser Doue-a hopta pezü shi masayatettsü, ta iba France club yagi sangdong ka ajanga metetdaktsü.

Hokolbarnü Ukraine goal 2-0 agi akokba asaya nung Doue yiruba sülen forward Dembele-

i pa melena liasü, saka pa-a minute 81buba nung yirur tugutsüsa aküm.

PSG pur parnok indang Champions League title ya kidang September 17 nü Atalanta den asaya-a defend asü tenzüksü aser iba sülen parnok October 1 nü taoba season semi-finalists Barcelona den asayatsü atema Spain-i aotsü.

Taoba season PSG puri Ligue 1, Coupe de France aser Champions League koka asayaba mapang asayar anaprongla yagi kanga tongtibang shilem agiogo. European final nung Inter Milan

goal 5-0 agi akokba asaya nung Doue-i goal idaktsü aser pa nem man of the match naroküm agüja liasü.

Iba sülen tenaprongla Uefa indang team of the tournament nung züngoksema liasü.

Dembele ya taküm Ballon d'Or angutsü imlartem rongnung ka lir. Iba tetushi agütsüba sentong ya September 21 nü agitsü lir.

PSG pur league season kanga junga tenzükogo aser parnoki asaya asem nung asemprongla kokogo. International break sülen parnok taruba asaya Lens den asayatsü lir.

Archery World C'ships: India tebur compound team-i gold angu

Rongjui/September 7, 2025

(Agencies): India tebur compound archery team-i otsü tasen ka yanglua World Championships nung mezügbuba gold medal nguogo. Parnoki Deobarnü final nung France team koka liasü.

Final asaya nung Rishabh Yadav, Aman Saini, aser Prathamesh Fuge nungeri 235-233 agi France team koka liasü.

Iba asayamung nung India team ya second seeded team liasü. Final nung score 176-176 ta kasasa aliba mapang India team-i süngjemshir asaya aser tatembangbuba round nung point 59 ngua parnoki asaya akok. France team-i tatembangbuba round nung point 57 ngua liasü.

Final tonga asayaba mapang India team-i Australia, powerhouse USA, aser Turkey nunger koka liasü.

Deobarnüsa India nunger

archer Jyothi Surekha Vennam aser Rishabh Yadav nati final nung 155-157 ta tera agi Netherlands makokba sülen silver medal ngua liasü.

Gwangju, Korea nung World Archery Championships tenzükba anogo lanur compound archer Rishabh Yadav-i kanga junga asayaba sülen India nunger asayartemi medal anabo angutsü jangjar liasü.

Rishabh, shibai qualifying nung point 709 ngua tibuba nung tembanga liasü pai Aman Saini aser Prathamesh Fuge na den longjemer Australia, aser USA, aser Turkey akokba nung teyari agütsü aser iba sülen France den final asaya liasü.

Ajisüaka India tetsür defending champion team nung Jyothi, Parneet Kaur, aser Prithika Pradeep nunger Compound Women's Team event tanabuba round nung Italy team-i 229-233 agi tsükdakja liasü.

BENDANGLI OSANG : Tapak 7 nungi...

Russia-i Kyiv amak...

Linük yimtiba military tekolakba Tkachenko-i Telegram nung ashiba agi, Russia nungertemi asaa civilian tem amaker.

Kyiv amakba dak sendakba nung Moscow-i kecha telangzüba agüja mali.

Linük anapronglai civilian tem amakba atema aitsüba magizüki arudar, saka Russia-i 2022 küm February ita nungi Ukraine amak tenzükba sülen civilian meyirejang aika süogo.

Ukraine air force-i Russia-i drone aser missile yokba atema tekümdangtsü metetdaktsüba sülen Deobarnü Ukraine kübok tesem timba ka air raid alerts kübok liasü.

Maneni Kremenchuk yimtia bomb agi anakshitsüogo aser iba ajanga yimti nung tesem kar nungbo power makai aküm, ta Mayor Vitalii Maletskyi-i Telegram ajanga metetdaktsü.

Russia-isa, Kryvyi Rih yimti nung transport aser urban infrastructure tem maka liasü, ta yimti indang military administration tekolakba Oleksandr Vilkul-i Telegram ajanga metetdaktsü. Ajisüaka nisung asüba osangbo kecha mali.

Odesa yimti nung civilian infrastructure aser nisung aliba kitem raksaogo aser ki aika nung mi adoka liasü, ta regional Governor Oleh Kiper-i ashi.

Maneni Ukraine kübok northeastern Sumy tesem

Russia-i amakba sülen nisung ka asü aser aika yiruogo, ta regional military Governor Oleh Hryhorov-i Telegram ajanga ashi.

Honibarnü nikongtsütsü Russia-i drone amshia Zaporizhia amakba sülen nisung 15 yirutsü aser parnok rongnung pezübo mozükidangi anir ao, ta iba tesem nung military administration tekolakba Ivan Fedorov-i ashi. Iba tesem ya Russia-i tilakabo at sünger lir.

Raraba tesem nung Russia nunger sepaitemi tanem tanemi tejakdangi odar, ta Basravi-i metetdaktsü.

Russia nunger sepaitemi grey zone ka kümtettsü atema anütoklen arrtsü atsülanga odar, ta paisha ashi.

Russian Defence Ministry-i Deobarnü ashiba agi, parnok sepaitemi Dnipropetrovsk region kübok Khoroshe yimtsüng atsüngogo.

Kasa mapang nung Ukraine indang drone forces Robert Brovdi-i ashiba agi, parnoki Russia kübok Bryansk tesem nung Druzhba oil pipeline maka liasü.

Iba transit pipeline yagi Russia indang totzü Hungary aser Slovakia na nem agütsür, shirnoki maneni Russia dang nungi totzü alidar.

Ajisüaka Hungarian refiner MOL otongdar kati ashiba agi, par linük nem toktzü agütsüba nung kecha tetsüdaktsü madoki lir.

BILEMDANGANG

"Nai jangraba mapa ka inyaka mapang intokbaji mapang amajok nung intokba masü."